

enfermé sous clef le voulurent contraindre de contenter leur deshonesteté, ce qu'ayant absolument refusé, elles l'estranglerent & firent mourir miserablement, ce qui fut sceu par nos Religieux qui louèrent Dieu, que ce Frere en un aage si tendre, si gay & iouial de son naturel, auoit pû (assisté de la grace de Dieu) résister à la furie de ces femmes.

302 Ces matrones ont la prudence & le soin de briser leurs assemblées auant le retour de || leur* marys, & se rendent toutes si sages que vous diriez à les voir qu'elles n'ont toutes de consolation qu'en la presence de leurs marys, auxquels elles tiennent de la viande toute preste, & du bouillon tout chaud, qu'elles leur font aualler quand ils arriuent pour les delasser, qui est une inuention admirable, car ils tiennent par experience, que quand ils boient leur bouillon, ou faute d'iceluy de l'eau chaude allans ou reuenans de la chasse, ils n'ont iamais les iambes roides.

Les hommes font aussi leurs festins, & à diuerses intentions ainsi que font nos Hurons, ou par recreation ou pour gratifier un amy, ou pour obseruer un songe, à la pluspart desquels il faut tout manger ou creuer à la peine, & pour plusieurs autres intentions & respects que nous ne sçauons pas, mais si c'est pour auoir bonne chasse, ils se donnent bien de garde que les chiens n'en goustent tant soit peu; car tout seroit perdu & leur chasse ne vaudroit rien à leur dire, mais qui croiroit une telle sottise.

Comme le Pere Joseph le Caron, & l'un de nos freres se trouuerent un Hyuer avec eux, un barbare nommé Mantouiscache, songea que Choumin auoit